

Na osnovu čl. 187. stav (8), 204. stav (9) i 248. Zakona o bankama ("Službene novine Federacije BiH", broj: 27/17), člana 5. stav (1) tačka h) i člana 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17) i člana 12. stav (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj: 03/18), Upravni odbor Agencije za bankarstvo Federacije Bosne i Hercegovine, na sjednici održanoj dana 29.03.2018. godine donosi

**ODLUKU
O POSTUPKU I NAČINU VRŠENJA OTPISA ILI KONVERZIJE
INSTRUMENATA KAPITALA I OBAVEZA BANKE**

I. OPŠTE ODREDBE

Član 1.

Predmet odluke

Ovom odlukom propisuju se uslovi otpisa ili konverzije instrumenata kapitala, postupak i način vršenja konverzije ili otpisa obaveza banke u restrukturiranju, kao i uslovi korištenja sredstava osiguranih za restrukturiranje.

Član 2.

Subjekti odluke

Ova odluka primjenjuje se na:

- a) banke sa sjedištem u Federaciji Bosne i Hercegovine kojima je Agencija za bankarstvo Federacije Bosne i Hercegovine (u daljem tekstu: Agencija) izdala bankarsku dozvolu, i
- b) bankarsku grupu koja je predmet kontrole Agencije na konsolidovanoj osnovi.

Član 3.

Pojmovi

- (1) Pojedini pojmovi koji se upotrebljavaju u ovoj odluci imaju sljedeće značenje:
 - a) „**restrukturiranje**” znači primjenu instrumenta restrukturiranja kako bi se postigao barem jedan od ciljeva restrukturiranja;
 - b) „**mogućnost oporavka**” znači mogućnost banke da obnovi svoj finansijski položaj nakon znatnog gubitka vrijednosti;
 - c) „**prihvatljive obaveze**“ su obaveze na koje se može primijeniti instrument unutarnjeg restrukturiranja.
- (2) Pojmovi koji nisu definisani stavom (1) ovog člana, a koriste se u ovoj odluci, imaju značenja u skladu sa odredbama Zakona o bankama (u daljem tekstu: Zakon).

II. OTPIS ILI KONVERZIJA INSTRUMENATA KAPITALA

Član 4.

Zahtjev za otpis ili konverziju instrumenata kapitala

- (1) Agencija može provesti otpis ili konverziju relevantnih instrumenata kapitala u instrumente redovnog osnovnog kapitala, ako utvrdi postojanje jedne ili više okolnosti iz člana 186. stav (3) Zakona.
- (2) U skladu sa stavom (1) ovog člana, Agencija može izvršiti otpis ili konverziju kapitala u dionice ili druge instrumente vlasništva banke:
 - a) nezavisno od mjera restrukturiranja;

- b) zajedno s provođenjem mjere restrukturiranja, ako su ispunjeni uslovi za restrukturiranje banke.
- (3) U smislu člana (1) ove odluke, a u vezi člana 186. stav (3) tačka b) Zakona, smatra se da banka neće moći nastaviti redovno poslovanje ako se ne izvrši smanjenje vrijednosti ili pretvaranje relevantnih instrumenata kapitala ako su ispunjeni uslovi iz člana 188. stava (3) Zakona.

Član 5.

Provedba otpisa ili konverzije instrumenata kapitala

- (1) Prije nego što provede otpis ili konverziju instrumenata kapitala u skladu s članom 187. Zakona Agencija provodi procjenu vrijednosti imovine i obaveza banke u skladu s članom 189. Zakona i Odlukom o uslovima i načinu vršenja nezavisne procjene vrijednosti imovine i obaveza banke prije i u toku postupka restrukturiranja banke.
- (2) Ako se vrši otpis, odnosno smanjene vrijednosti glavnice relevantnih instrumenata kapitala u skladu sa članom 187. Zakona to smanjenje ima sljedeće efekte:
- a) smanjenje je trajno, uz mogućnost povećanja vrijednosti u skladu s mehanizmom nadoknade u skladu sa Zakonom i odredbama ove odluke;
 - b) vlasnik relevantnog instrumenta kapitala nema prava na osnovi dijela vrijednosti instrumenta koja je smanjena ili pretvorena, osim:
 - 1) prava na kamate i druge tražbine temeljem tog instrumenta obračunate na dan smanjenja vrijednosti ili pretvaranja relevantnog instrumenta kapitala,
 - 2) vlasnik relevantnog instrumenta kapitala nema prava na osnovi dijela vrijednosti instrumenta koja je smanjena ili pretvorena, osim već obračunatih obaveza u vezi s naknadom štete do koje može doći zbog pravnog lijeka kojim se pobija zakonitost izvršavanja ovlasti otpisa,
 - 3) ne isplaćuje se nikakva naknada nijednom imatelju relevantnih instrumenata kapitala osim one u skladu s članom 187. stav (3) Zakona;
- (3) Agencija može banci naložiti izdavanje novih instrumenata redovnog osnovnog kapitala, vlasnicima relevantnih instrumenata kapitala čija je vrijednost smanjena s ciljem pretvaranja tih instrumenata, a u skladu sa članom 187. stav (3) Zakona.
- (4) Relevantni instrumenti kapitala mogu se pretvoriti u instrumente redovnog osnovnog kapitala samo ako su ispunjeni sljedeći uslovi:
- a) instrumente redovnog osnovnog kapitala izdaje banka uz prethodno odobrenje Agencije;
 - b) instrumenti redovnog osnovnog kapitala izdaju se prije nego što banka izda dionice ili druge vlasničke instrumente za primjenu sredstava vanredne javne finansijske podrške ulaganjem u regulatorni kapital;
 - c) instrumenti redovnog osnovnog kapitala dodjeljuju se i prenose bez odgode nakon izvršenja ovlasti otpisa ili konverzije relevantnih instrumenata kapitala;
 - d) stopa konverzije kojom se određuje broj instrumenata redovnog osnovnog kapitala koji se dodjeljuju za svaki relevantni instrument kapitala u skladu je s načelima koja se primjenjuju kod stope konverzije u vlasnički kapital.
- (5) U svrhu osiguranja instrumenata redovnog osnovnog kapitala u skladu sa ovim članom Agencija može naložiti banci da pribavi sva potrebna prethodna odobrenja za izdavanje potrebnog broja instrumenata redovnog osnovnog kapitala.

III. PRIMJENA INSTRUMENTA UNUTRAŠNJEG RESTRUKTURIRANJA

Član 6.

Unutrašnje restrukturiranje

- (1) Ako je rješenjem o restrukturiranju određeno da se kod restrukturiranja primjeni instrument unutrašnjeg restrukturiranja (bail-in instrument) u cilju ispunjavanja ciljeva i načela restrukturiranja Agencija će tim rješenjem odrediti da se ono provodi putem:
 - a) povećanja regulatornog kapitala banke, u mjeri u kojoj banka ponovno ispunjava uslove potrebne za rad i nastavak poslovanja u skladu sa Zakonom i održavanje povjerenja finansijskog tržišta u banku;
 - b) konverzije obaveza i dužničkih instrumenata u dionice ili druge vlasničke instrumente ili smanjenja glavnice obaveza i dužničkih instrumenata koji se prenose:
 - 1) na banku za posebne namjene s ciljem osiguravanja kapitala banke za posebne namjene,
 - 2) primjenom instrumenta prodaje poslovanja ili instrumenta odvajanja i prijenosa imovine.
- (2) Rješenje iz stava (1) tačke a) ovoga člana Agencija će donijeti ako postoji realna mogućnost da će primjenom instrumenta unutrašnjeg restrukturiranja, uz druge mjere, uključujući mjere koje se provode u skladu s planom reorganizacije poslovanja, banka u postupku restrukturiranja ponovno postati finansijski stabilna i dugoročno održati redovno poslovanje.
- (3) Agencija može instrument unutrašnjeg restrukturiranja primijeniti samostalno ili u kombinaciji s drugim instrumentima restrukturiranja iz člana 197. Zakona.

Član 7.

Načela primjene

- (1) Agencija pri primjeni instrumenta unutrašnjeg restrukturiranja izvršava ovlasti u skladu s opštim načelima restrukturiranja, pri čemu se osobito vodi računa o sljedećim načelima:
 - a) dioničari banke u restrukturiranju prvi snose gubitke;
 - b) povjerioci banke u restrukturiranju snose gubitke nakon dioničara po redosljedu prioriteta njihovih potraživanja u skladu sa zakonom kojim se uređuje stečajni postupak;
 - c) prema povjericima koji u slučaju otvaranja stečajnog postupka ulaze u redosljed prioriteta postupa se na jednak način;
 - d) povjerioci ili dioničari ne trpe veće gubitke od onih koje bi pretrpjeli da je nad bankom u restrukturiranju bio pokrenut stečajni postupak.
- (2) Agencija kod primjene instrumenta unutrašnjeg restrukturiranja pri određivanju stope konverzije ili ovlasti otpisa ili konverzije relevantnih instrumenata kapitala cijeni da li je posvećena dovoljna pažnja kod zaštite prava vlasništva u skladu sa drugim zakonskim propisima koji nisu u suprotnosti sa odredbama Zakona.

IV. PODRUČJE PRIMJENE UNUTRAŠNJEG RESTRUKTURIRANJA

Član 8.

Prihvatljive obaveze

- (1) Instrument unutrašnjeg restrukturiranja primjenjuje se na sve obaveze banke u restrukturiranju koje nisu isključene iz primjene u skladu sa stavom (2) ovoga člana i članom 9. ove odluke.
- (2) U prihvatljive obaveze ne uključuju se:
 - a) obaveze po osnovu osiguranih depozita, do iznosa osiguranog u skladu sa propisom kojim se uređuje osiguranje depozita u bankama;
 - b) obaveze čije je ispunjenje osigurano založnim pravom, sredstvom finansijskog osiguranja ili drugim srodnim pravom, uključujući repo poslove, pokrivene obveznice ili obaveze iz finansijskih instrumenata koji se koriste za zaštitu od rizika i čine sastavni dio imovine za pokriće i koji su osigurani na sličan način kao pokrivene obveznice;
 - c) obaveze nastale upravljanjem imovinom i novcem klijenata, uključujući imovinu ili novac klijenata koje banka u restrukturiranju čuva za račun investicionih i mirovinskih fondova ako su ta sredstva posebnim zakonom izuzeta iz likvidacijske ili stečajne mase;

- d) obaveze prema bankama u Bosni i Hercegovini i stranim bankama i investicijskim fondovima, isključujući članove iste grupe čiji je prvobitni rok dospijeca kraći od sedam dana;
- e) obaveze s preostalim rokom dospijeca kraćim od sedam dana prema platnim sistemima i sistemima za poravnanje vrijednosnih papira, odnosno operaterima tih sistema i učesnicima u tim sistemima, koje su nastale po osnovi učešća u tim sistemima;
- f) obaveze prema:
 - 1) uposlenima na osnovu obračunatih, a neisplaćenih plata, doprinosa za obavezno penziona i zdravstveno osiguranje ili ostalih fiksnih primanja, osim za varijabilne naknade koje nisu regulirane zakonom ili kolektivnim ugovorom,
 - 2) povjeriocima na osnovu prodaje robe ili pružanja usluga banci u restrukturiranju, a koji su ključni za svakodnevno poslovanje ove banke, uključujući usluge informacionih tehnologija, komunalne usluge i usluge zakupa, servisiranja i održavanja poslovnih prostorija,
 - 3) poreznim organima i tijelima kojima se plaćaju doprinosi za socijalno osiguranje, pod uslovom da te obaveze imaju prednost pri namirenju u skladu sa Zakonom i drugim propisima,
 - 4) Agenciji za osiguranje depozita Bosne i Hercegovine po osnovu premije za osiguranje depozita;
- (3) Kod primjene instrumenta unutarnjeg restrukturiranja sva osigurana imovina povezana s pokrivenim iznosom pokrivenih obveznica ostaje jednako odijeljena i u iznosu koji je dovoljan za pokriće tih obveznica.
- (4) Agencija može i pored odredbi iz stava (2) tačka b) ovoga člana i stava (3) ovog člana primjeniti instrument unutarnjeg restrukturiranja banke i na dio obaveza koji prelazi vrijednost imovine, predmeta zalogu, založnog prava ili drugog sredstva osiguranja kojim je ta obaveza osigurana.

Član 9.

Isključivanje ili djelomično isključivanje prihvatljivih obaveza

- (1) Agencija, iznimno od člana 8. ove odluke može određene prihvatljive obaveze djelomično ili u cijelosti isključiti od primjene instrumenta unutarnjeg restrukturiranja i to ako:
 - a) vrijednost obaveze nije moguće u razumnom roku smanjiti ili pretvoriti, unatoč svim radnjama koje je Agencija poduzela u dobroj vjeri;
 - b) je isključenje nužno u cilju omogućavanja kontinuiteta ključnih funkcija i temeljnih poslovnih linija;
 - c) je isključenje nužno radi izbjegavanja širenja negativnih efekata na finansijski sistem, osobito u pogledu depozita koji podliježu osiguranju u skladu s propisima kojima se uređuje osiguranje depozita, a iznad visine osiguranog iznosa, čime bi se ozbiljno narušilo funkcioniranje finansijskih tržišta, uključujući infrastrukturu finansijskih tržišta, na način kojim bi se mogao prouzročiti ozbiljan poremećaj privrednog tržišta Federacije Bosne i Hercegovine ili privrede Bosne i Hercegovine;
 - d) bi primjena instrumenta unutarnjeg restrukturiranja na te obaveze rezultirala većim gubicima drugih povjerilaca.
- (2) Agencija pri donošenju odluke iz stava (1) ovoga člana mora uzeti u obzir:
 - a) načelo da gubitke prvo snosi dioničar, a zatim povjerilac banke u restrukturiranju prema redoslijedu prvenstva namire propisanom zakonom kojim se uređuje stečajni postupak i likvidacija,
 - b) sposobnost banke u restrukturiranju za pokriće gubitaka koju bi imala u slučaju isključenja obaveza,
 - c) potrebu da se osigura adekvatno finansiranje restrukturiranja.
- (3) U slučaju ako Agencija odluči djelomično ili u cijelosti isključiti prihvatljivu obavezu, iznos smanjenja vrijednosti ili pretvaranja koji se primjenjuje na ostale prihvatljive obaveze, može se

povećati za iznos takvih isključenja, pod uslovom da je iznos tog smanjenja vrijednosti ili pretvaranja koji se primjenjuje na ostale prihvatljive obaveze proveden na način da povjerioci ne trpe veće gubitke od onih koje bi imali da je nad bankom pokrenut postupak likvidacije ili stečaja.

(4) Agencija može propisati pravila kojima će odrediti okolnosti isključenja iz ovog člana.

V. PROVEDBA UNUTRAŠNJEG RESTRUKTURIRANJA

Član 10.

Procjena iznosa unutrašnjeg restrukturiranja

Agencija procjenu iznosa unutrašnjeg restrukturiranja vrši u skladu sa članom 206. Zakona i Odlukom o uslovima i načinu vršenja nezavisne procjene vrijednosti imovine i obaveza banke prije i u toku postupka restrukturiranja banke.

Član 11.

Redoslijed otpisa i konverzije

(1) Agencija primjenom instrumenta unutrašnjeg restrukturiranja, u skladu sa članom 208. Zakona i odredbama ove odluke može izvršiti otpis ili konverziju kako slijedi:

- a) prvo smanji vrijednost stavki redovnog osnovnog kapitala u skladu s otpisom i konverzijom instrumenata kapitala u iznosu koji je moguć i potreban;
- b) zatim smanji glavnice instrumenta dodatnog osnovnog kapitala u mjeri u kojoj je to moguće i potrebno i u skladu sa svojstvima instrumenta, ako je ukupno smanjenje u skladu s tačkom a) ovoga stava manje od zbroja iznosa iz člana 13. stava (2) tačaka b) i c) ove odluke;
- c) zatim smanji glavnice instrumenta dopunskog kapitala u mjeri u kojoj je to moguće i potrebno i u skladu sa svojstvima instrumenta, ako je ukupno smanjenje u skladu s tačkama a) i b) ovoga stava manje od zbroja iznosa iz člana 13. stava (2) tačaka b) i c) ove odluke;
- d) zatim smanji glavnice subordinisanog/podređenog duga koji nije uključen u stavke dodatnog osnovnog kapitala ili dopunskog kapitala, u mjeri u kojoj je to moguće i potrebno, u skladu s redoslijedom namirenja u stečajnom postupku, da bi zajedno sa smanjenjem vrijednosti u skladu s tačkama a), b) i c) ovoga stava dosegno zbroj iznosa iz člana 13. stava (2) tačaka b) i c) ove odluke, ako je ukupno smanjenje u skladu s tačkama a), b) i c) ovoga stava manje od zbroja iznosa iz člana 13. stava (2) tačaka b) i c) ove odluke;
- e) zatim smanji glavnice ili preostali iznos prihvatljivih obaveza, u mjeri u kojoj je to moguće i potrebno, u skladu s redoslijedom namirenja u stečajnom postupku, uključujući redoslijed namirenja depozita u stečajnom postupku u skladu sa zakonskim propisima, osim ako kod primjene instrumenta unutrašnjeg restrukturiranja nije određen drugačiji raspored pokrića gubitaka, da bi zajedno sa smanjenjem vrijednosti u skladu s tačkama a), b), c) i d) ovoga stava dosegno zbroj iznosa iz člana 13. stava (2) tačaka b) i c) ove odluke, ako je ukupno smanjenje iz tačaka a), b), c) i d) ovoga stava manje od zbroja iznosa iz člana 13. stava (2) tačaka b) i c) ove odluke.

(2) Agencija će prije provođenja smanjenja vrijednosti i konverziju gubitak iz člana 13. stava (2) tačaka b) i c) ove odluke, proporcionalno raspodijeliti na dionice odnosno druge vlasničke instrumente i prihvatljive obaveze iste kategorije, osim ako drugačiji raspored ne proizlazi iz primjene instrumenta unutrašnjeg restrukturiranja.

(3) Prilikom vršenja konverzije iz stava (1) ovog člana Agencija može primijeniti različite stope konverzije, na različite kategorije dioničara i povjerilaca iz tog stava uzimajući u obzir da se ista stopa primjenjuje na sve povjerioce iz istog reda prioriteta u skladu sa odredbama ovog zakona kojima se uređuje stečaj a da se povoljnija stopa konverzije primjenjuje na viši isplatni red.

- (4) Agencija će prije primjene stava (1) ovoga člana smanjiti vrijednost ili izvršiti konverziju glavnice instrumenata iz stava (1) tačaka b), c) i d) ovoga članka ako instrument sadrži odredbu kojom je predviđeno sljedeće:
- a) da se glavnica instrumenta smanjuje sa svakim događajem povezanim s finansijskim stanjem, solventnošću ili razinama regulatornog kapitala banke u postupku restrukturiranja;
 - b) kojom je određeno da se pri nastupu svakog takvog događaja omogućuje konverziju instrumenata u vlasničke instrumente.
- (5) Kada Agencija donosi odluku o smanjenju vrijednosti obaveze ili pretvaranju u instrumente redovnog osnovnog kapitala, ne može se izvršiti konverzija glavnice jedne kategorije obaveza dok obaveza koja je podređena toj kategoriji većim dijelom nije pretvorena u instrumente redovnog osnovnog kapitala ili joj nije smanjena vrijednost, osim ako je to dopušteno u izuzetnim slučajevima primjene instrumenta unutrašnjeg restrukturiranja.

Član 12. Derivati

- (1) Agencija je ovlaštena ugovor o derivatu učiniti dospelim i raskinuti na dan donošenja rješenja o pokretanju postupka restrukturiranja.
- (2) Agencija će propisati načela vrednovanja obaveza koje proizilaze iz derivata.

VI. POSTUPANJE PREMA DIONIČARIMA I ZAŠTITNE MJERE

Član 13.

Postupanje prema dioničarima pri primjeni unutrašnjeg restrukturiranja, odnosno kod otpisa ili konverzije instrumenata kapitala

- (1) Agencija će kod primjene instrumenta unutrašnjeg restrukturiranja prema dioničarima postupiti na način propisan članom 207. Zakona.
- (2) Agencija kod odlučivanja o primjeni instrumenta unutrašnjeg restrukturiranja u odnosu postupanja prema dioničarima uzeti će u obzir:
 - a) rezultate procjene vrijednosti provedene u skladu sa Odlukom o uslovima i načinu vršenja nezavisne procjene vrijednosti imovine i obaveza banke prije i u toku postupka restrukturiranja banke;
 - b) iznos u kojem, prema procjeni, stavke redovnog osnovnog kapitala moraju biti smanjene i vrijednost relevantnih instrumenata kapitala mora biti smanjena ili ti instrumenti moraju biti pretvoreni u skladu sa zahtjevima za otpis ili konverziju kapitala i provođenje otpisa ili konverzije, i
 - c) ukupni procijenjeni iznos u skladu sa procjenom iznosa unutrašnjeg restrukturiranja.

Član 14.

Postupanje prema dioničarima i povjeriocima u slučaju djelomičnih prijenosa i primjene instrumenta unutrašnjeg restrukturiranja

- (1) Ako Agencija primjenjujući jedan ili više instrumenata restrukturiranja, uključujući instrument unutrašnjeg restrukturiranja prenese samo dio prava, imovine i obaveza banci u restrukturiranju, dužna je, primjenjujući član 213. Zakona osigurati da dioničari i oni povjerioci čije obaveze nisu prenesene dobiju kao namirenje svojih obaveza barem onaj iznos u kojem bi bili namireni da je u vrijeme kad je doneseno rješenje o pokretanju postupka restrukturiranja u skladu s članom 190. Zakona nad bankom u restrukturiranju proveden stečajni postupak.
- (2) Ako Agencija primjenjuje instrument unutaršnjeg restrukturiranja, dužna je, primjenjujući član 213. Zakona osigurati da dioničari i povjerioci za obaveze čija je vrijednost smanjena ili pretvorena u instrument redovnog osnovnog kapitala ne snose gubitak veći od gubitka koji bi

snosili da je u vrijeme kad je doneseno rješenje o pokretanju postupka restrukturiranja nad bankom u restrukturiranju proveden stečajni postupak.

VII. KORIŠTENJE SREDSTAVA ZA FINANSIRANJE RESTRUKTURIRANJA BANKE

Član 15.

Upotreba sredstava izvora finansiranja u slučaju isključenja ili djelomičnog isključenja prihvatljivih obaveza

- (1) U slučaju isključenja ili djelomičnog isključenja prihvatljivih obaveza iz člana 8. ove odluke, a gubici nisu u potpunosti preneseni na ostale povjerioce, može se iz izvora finansiranja restrukturiranja banci u restrukturiranju uplatiti iznos radi ispunjenja jedne ili obje mogućnosti:
 - a) pokrivanja svih gubitaka koji nisu u potpunosti pokriveni prihvatljivim obavezama i kako bi neto vrijednost imovine banke u restrukturiranju bila jednaka nuli u skladu s članom 206. stav (1) tačka a) Zakona;
 - b) kupovinu dionica ili drugih vlasničkih instrumenata ili drugih instrumenata kapitala banke u restrukturiranju u svrhu dokapitalizacije banke u skladu s članom 206. stav (1) tačka b) Zakona.
- (2) Agencija može sredstva finansiranja u svrhe iz stava (1) ovoga člana koristiti u skladu sa članom 214. Zakona.

Član 16.

Upotreba izvora finansiranja restrukturiranja

- (1) Agencija može upotrebljavati izvore finansiranja restrukturiranja samo u mjeri u kojoj je potrebno kako bi se osigurala učinkovita primjena instrumenata restrukturiranja u sljedeće svrhe:
 - a) za osiguranje imovine ili obaveze banke u restrukturiranju, njezinih društava kćeri, banke za posebne namjene ili društva za upravljanje imovinom;
 - b) za odobravanje kredita/zajmova banci u restrukturiranju, njezinim društvima kćerima, banci za posebne namjene ili društvu za upravljanje imovinom;
 - c) za kupnju imovine banke u restrukturiranju;
 - d) za uplatu kapitala i osiguranje drugih potrebnih sredstava banci za posebne namjene ili društvu za upravljanje imovinom;
 - e) za plaćanje naknade štete dioničarima ili povjeriocima u skladu s članom 213. Zakona;
 - f) za nadoknade banci u restrukturiranju iznosa nastalog isključenjem prihvatljivih obaveza određenih povjerilaca od primjene instrumenta unutrašnjeg restrukturiranja u skladu s odredbama ove odluke;
 - g) za pozajmljivanje drugim aranžmana na dobrovoljnoj osnovi;
 - h) za poduzimanje bilo koje kombinacije mjera iz tačkaka a) do g) ovoga stava.
- (2) Izvori finansiranja restrukturiranja ne koriste se izravno za nadoknađivanje gubitaka ili za dokapitalizaciju banke u restrukturiranju.
- (3) U slučaju da korištenje izvora finansiranja restrukturiranja za potrebe iz stav (1) ovoga člana neizravno dovede do toga da se dio gubitaka banke u restrukturiranju pokrije iz izvora finansiranja, primjenjuju se načela za korištenje izvora finansiranja utvrđena u članu 204. Zakona.

VIII. PRELAZNE I ZAVRŠNE ODREDBE

Član 17.

Stupanje na snagu

Ova odluka stupa na snagu osmog dana od dana objavljivanja u „Službenim novinama Federacije BiH“.

Broj: U.O.-18-09/18
Sarajevo, 29.03.2018. godine

PREDSJEDNICA
UPRAVNOG ODBORA

mr. sc. Ljerka Marić, dipl.ecc. s.r.